

Program Trans U Elemen Menuju Kegemilangan UMP



Kuantan, 30 Oktober – Lebih 50 orang staf UMP menyertai Program 'Transformation for You and UMP' (Trans U) anjuran Bahagian Latihan dan Pengembangan Kompetensi (BLPK) yang diadakan di Cheringin Hills Janda baik baru-baru ini. Menggunakan motto 'Menyayangi UMP seperti menyayangi diri sendiri' program dikendalikan penceramah bertauliah dan berpengalaman luas dalam menerapkan konsep kerja secara berpasukan serta memupuk daya kepimpinan dan komunikasi berkesan.

Program bertujuan untuk memperkasakan staf UMP bagi mengamalkan budaya kerja secara berpasukan, kepimpinan yang berkesan dan komunikasi yang strategik selari dengan tema Pelan Strategik UMP 2016-2020 iaitu 'Menuju Kegemilangan'.

Timbalan Pendaftar BLPK, Hazmin Aris berkata, Naib Canselor UMP dalam Sesi Taklimat Kesediaan Pelan Strategik UMP 2016-2020 telah menyatakan staf UMP perlu membudayakan pelaksanaan kerja yang berinovasi dan 'berfikir di luar kotak' bagi memastikan UMP menyaingi malahan melangkaui universiti-universiti penyelidikan (RU) lain.



Justeru, melalui program Trans U, para peserta telah disuntik dengan elemen-elemen pembudayaan kerja secara berinovasi dan 'berfikir di luar kotak' melalui input dan aktiviti memupuk kepimpinan, berkomunikasi secara strategik dan kerja secara berpasukan bagi mencapai Petunjuk Prestasi Utama (KPI) yang telah ditetapkan.

Bagi konsultan atau penceramah yang dilantik, Umar Abdul Aziz Ramli daripada syarikat perundingan latihan terkenal di Malaysia berkata, pelaksanaan program ini telah direka modulnya oleh pihak UMP melalui BLPK yang telah membuat kajian dengan mendalam bagi setiap pengisian program dan outcome yang akan dihasilkan.

"Tanya dibangunkan dengan teliti dengan mengambilkira penandaarasan pelaksanaan program yang sama seperti di Universiti Penyelidikan (RU) lain termasuk di universiti terkemuka luar negara.



"Para peserta diberikan input-input yang terperinci dan jelas berkenaan budaya kerja secara berpasukan, kepentingan kerja secara berpasukan, kaedah kepimpinan yang sesuai digunakan dan metodologi komunikasi yang berkesan. Komitmen yang ditunjukkan oleh peserta adalah sangat baik di mana sepanjang program berjalan para peserta telah menepati masa yang telah ditetapkan, berdisiplin dan berdedikasi dalam menyempurnakan setiap tugas dan cabaran yang diberikan," katanya.

Menurut peserta dari Fakulti Kejuruteraan Pembuatan, Dr. Muhammad Azzat Zakaria, berkata, menerusi program ini kita dapat memupuk semangat kerja secara berpasukan dengan kaedah yang betul melalui tindakan, komunikasi dan gaya kepimpinan yang bersesuaian selari dengan situasi dan persekitaran kerja yang dilalui.

Selain itu, menurut Dr. Zuriani Mustaffa, dari Fakulti Sistem Komputer & Kejuruteraan Perisian berpendapat, pembudayaan kerja secara berpasukan, kepimpinan dan komunikasi yang strategik yang diperolehi melalui program ini sangat berfaedah dan membantu bagi meningkatkan kaedah pengurusan dan operasi kerja di jabatan.

Manakala aktiviti luar yang dijalankan sangat menyeronokkan kerana ianya agak mencabar minda dan fizikal serta menguji kesabaran setiap peserta yang terlibat. Aktiviti tersebut telah dikupas secara terperinci oleh fasilitator dan para peserta dapat mempelajari aspek-aspek kelemahan dan kekuatan pada diri masing-masing yang tersingkap dalam aktiviti-aktiviti yang dijalankan. Saya menjadi semakin berani dan kreatif menghadapi sebarang cabaran dan permasalahan yang timbul di jabatan dalam pelaksanaan kerja-kerja seharian".



Begitu juga Dr. Mohd Ashraf Ahmad dari Fakulti Kejuruteraan Elektrik & Elektronik berpendapat pengisian kerohanian yang diberikan melalui program ini adalah selari dengan Nilai Teras UMP yang pertama iaitu 'Hubungan Yang Erat Dengan Pencipta' kerana penceramah yang dilantik begitu berwibawa kerana dapat memberikan kesedaran tentang keperluan dan tanggungjawab kita semua sebagai staf UMP untuk memberikan perkhidmatan yang terbaik.

Ianya dapat memastikan segala amalan baik yang dilakukan bagi mematuhi suruhan agama dan menghindari larangan agama dapat dikaitkan dengan kerja-kerja seharian yang dilaksanakan. Ianya membolehkan amalan-amalan baik yang dilaksanakan semasa beribadah kepada Tuhan dapat diteruskan dalam menjalankan amanah pelaksanaan peranan dan fungsi sebagai anggota pekerja di UMP bagi mencapai dan merealisasikan Visi dan Misi UMP.

Berita dan gambar disediakan Mohd. Ruzaini Hashim dari Bahagian Latihan dan Kompetensi Staf

Posted By : NOR FADZILLAH BINTI ZULKIPLI Date Posted : 03-11-2015, 13:16:07